

Johannes van den Bosch overhaandigt eerste boek

www.stellingplus.nl - nijs - algemien

12 september 2020 by [Redaktie](#)



Op vri'jdagmiddag 11 september was in hotel-resteraant Villa Nova in Zorgvlied de prissentasie van de ni'jste utgifte van de Stellingwarver Schrieversronte. Et gong om 'Uit de geschiedenis van Wateren, Zorgvlied en Oude Willem', mit bi'jdregen van Janneke Hielkema, Albertha Bloemhoff, Carol Jan Klok en Hans Salverda . Et eerste exemplaor wodde deur de historische Johannes van den Bosch uutrikt an 'kolonioloog' Wil Schackmann. Schackmann is kenner bi'j uutstek van de vroegere klonies van de Maatschoppi'je van Weldaodighied en publiceerde daor eerder uitvoerig over.



Schrieversrontevezurzitter Klaas van Weperen eupende de middag. Links Wil Schackmann, in de midden Carol Klok, achter heur Janneke Hielkema.

Familie...

In et eupeningswoord deur Schrieversrontevezurzitter Klaas van Weperen bleek mitien hoe die van teveuren et ni'je boek grondig lezen hadde. Van Weperen hadde daorbi'j o.e. verschillende familielijnen ontdekt naor meensken daor in et boek over schreven is of die deur Hans Salverda interviewd weren, zoas Jan Pol in et heufdstok over de Twiede Wereldoorlog en dat schreven wodde deur Albertha Bloemhoff, die ok de ere heufdstokken redigeerd het.

Van Weperen gaf an dat hi'j biezunder mit inneumen is mit dit ni'je boek en dat et een verrieking is veur de uitgeveri'je van zien stichting.

Regio-onderzaker en auteur Carol Klok hadde et in zien inleiding over et tot staand kommen van et boek ok over zien familie; dat die aenlik de oorzaeke west was om veerder onderzuuk te doen naor de geschiedenis van Zorgvlied, Waoteren en Oolde Willem. Zo bleek bi'j zien uutzukeri'je naor de achtergronden van zien veuroolden dat zien betovergrootpake Adriaan Kasper was, en dat die as weesjonge uut Zeelaand naor et laandbouwinstituut in Waoeteren gong. Op zien 24^e wodde hi'j onderdirekteur an etzelde laandbouwinstituut. In et boek schrift Klok over Kasper, mar wijdde ok een heufdstok over et zo interessaante laandbouwinstituut zels en over de Mij van Weldadighied. An et aende van zien boeiende verhael daankt Carol Klok de ere auteurs van et boek veur de plezierige kontakten, en Schrieversrontedirekteur Sietske Bloemhoff veur heur altied positieve en optimistische inzet veur et boek.

Johannes van den Bosch

Et eerste exemplaor van et boek wodde deur de historische persoon Johannes van den Bosch – de oprichter van de Mij van Weldadighied en de eerste laandbouwschoele van Drenthe – uutrikt an onderzaker en schriever Wil Schackmann. Veul geneudigden bleken liekewel nogal wat trekken van ammeteur-historikus Hans Salverda in de persoon te herkennen... 'Van den Bosch' hul een humoristische toespraoke, en bleek ok arg ingeneumen mit et boek, ok al gong ien heufdstok over een periode daor hi'j nog gien weet van hebben kon. In een coronavri'je kleine kroje ruulde hi'j daornao et eerste boek naor Schackmann.

Wil Schackmann

Schackmann was dudelik bliede mit et ni'je boek; ok hi'j hadde et van teveuren even lezen kund. Bliede mit een boek over een tal biezondere onderwarpen van de regio daor hi'j ok zo bi'j betrokken raekte deur zien onderzukings. Bliede ok omreden d'r een tal punten in et boek an de odder kommen, die veur him ni'j weren. Nao ofloop van de middag kwammen d'r mitien al plannen op 'e bodden veur veerdere saemenwarking.



Et twiede exemplaor van et boek was veur Henk Doeven van de gemiente Westerveld, die daor hielemaole verrast deur bleek. Hi'j gaf an dat vanzels mit te nemen naor zien kollege, mar kocht mitien ok een exemplaor veur himzels.

Voonsten bi'j Tronde en Langedieke

Ok et heufdstok van archeologe Janneke Hielkema is ommeraek veul wardering veur, zo vertelde Sietske Bloemhoff in heur slotwoord van de middag. Zo is et onderzuuk naor en de beschrijving van de archeologie van et Drents-Friese Woold en et gebied d'r roem omhenne niet eerder op zoe'n uitvoerige en dudelijke wieze beschreven. Roem d'r omhenne wil zeggen dat d'r bi'jglieks ok over voonsten in Tronde, Else en Langedieke verteld wodt.

Bloemhoff daankte tot slot de mitwarkers veur de inzet veur disse ni'jste uitgifte van de Stellingwarver Schrieversronte en gaf an dat et veur heur, in heur funktie as direkteur van de stichting, de laeste boekprissentasie was. An et aende van et jaor gaot zi'j mit pensioen.

'Uit de geschiedenis van Wateren, Zorgvlied en Oude Willem' telt 82 bladzieden op A-4 fermaot, en is veurzien van fraaie ofbelings en kost tot 21 september € 17,50; daornao € 19,95. Et boek kan bi'j de Stellingwarver Schrieversronte besteld wodden via info@stellingwarfs.nl.